

Агентлик бошлиғи Навоийда тадбиркорлар билан учрашди

Ўзбекистон Республикасининг 2014 йил 3 декабрдаги 378-сонли «Жисмоний ва юридик шахсларнинг мурожаатлари тўғрисида»ги Қонунининг ижроси доирасида ўтган йилдан бошлаб давлат бошқарув ва хўжалик органлари раҳбарларининг ҳудудларда сайёр қабуллар ўtkазиши йўлга қўйилган эди. «Халқ билан мулоқот ва инсон манфаатлари йили»да давлат идораларининг ўз «аудиторияси» билан алоқалари янада мустаҳкамланмоқда.

Йил бошида тасдиқланган режа-жадвалга мувофиқ, 3 март куни Агентлик бошлиғи Навоий вилоятида бўлиб, маҳаллий тадбиркорларни қабул қилди. Учрашув кўринишида ташкил этилган тадбирда Агентликнинг маҳаллий ҳудудий бўлими мутасаддилари ҳамда вилоятдаги автотранспорт корхоналарининг раҳбар ва вакиллари иштирок этдилар.

Даставвал Агентлик бошлиғи В. Исмоилов Ўзбекистон Республикаси Президентининг 2017 йил 10 январдаги «Аҳолига транспорт хизмати кўрсатиш ҳамда шаҳарлар ва қишлоқларда автобусларда йўловчилар ташиш тизимини янада такомиллаштириш чора-тадбирлари тўғрисида»ги ПҚ-2724-сон қароридан сўз очиб, ушбу ҳужжат ижроси доирасида Навоий вилоятида амалга оширилажак ишлар, жумладан, вилоят аҳолиси учун янги автобус ва микроавтобуслар харид қилиш, янги автостанция қурилиши, янги йўналишларни очиш, йўловчи ташиш транспортида йўлкирани нақд пулсиз тўлаш тизимини жорий этиш каби вазифаларга бирма-бир тўхталиб ўтди.

Шундан сўнг Агентлик бошлиғи тадбиркорларнинг ечим топилмаётган масалалар, муаммолар юзасидан саволларини, шунингдек соҳани ривожлантиришга доир таклифларини тинглади.

Хусусан, «Санжар Нур Транс» МЧЖ раҳбари И. Ярқулов лицензия олиш учун ҳужжатларни қабул қилиш ва лицензияларни беришнинг электрон тизимининг қачон жорий этилиши билан қизиқди, шунингдек йўналишсиз такси автомобилларининг вақтинча касса машиналарисиз ишлаб туриши учун ваколатли идоралардан рухсат олишда амалий ёрдам сўради. Агентлик бошлиғи унга электрон тизим ҳозирда синовдан ўтказилаётганини, муваффақиятли деб топилганидан сўнг Агентлик ва ҳудудий бўлимларда жорий этилишини маълум қилди. Енгил таксилардан касса машиналарисиз фойдаланиш хусусида эса мамлакат Бош вазирига таклиф хати юборилганини билдириди.

«Кармана Мото Транс» МЧЖдан Н. Мирзаев аҳолига арzon нархларда хизмат кўрсатишда давом этиш, айни чоғда сарф-харажатларни камайтириш учун тадбиркорларга маҳсус фондлардан дизель ёнилғиси ажратиш имкониятлари ҳақида мурожаат қилди. Агентлик бошлиғи республикамиз ва бутун дунёда нефть маҳсулотлари бозоридаги вазият, қолаверса экология талабларидан келиб чиқсан ҳолда автотранспорт паркини газ ёнилғисига ўтказиш афзаллигини тушунтириб, бу борада зарур ташкилий ёрдам кўрсатишга ваъда берди.

Агентлик бошлиғи барча саволларга батафсил жавоб берди, қатор масалалар шу ернинг ўзида ҳал этилди. Ҳудудий бўлимнинг ваколатлари доирасида ечим топиш мумкин бўлган масалалар юзасидан бўлим мутасаддиларига вазифалар топширилди. Республика миқёсидаги бошқа ташкилот ва муассасалар ёрдамида бартараф этиладиган муаммоларга доир барча саволларни эса В. Исмоилов алоҳида белгилаб олиб, ўрнатилган тартибда кўмаклашишга ваъда берди.

Қабул якунида бу каби учрашувлар келгусида ҳам мунтазам равища ташкил этилиши, шунингдек ташувчилар ўз муаммо ва таклифлари юзасидан Ўзбекистон автомобиль ва дарё транспорти агентлигининг 202-22-55 рақамли “ишонч телефони” ва “Агентлик бошлиғининг виртуал қабулхонаси” Ягона интерактив давлат хизматлари портали орқали мурожаат қилишлари мумкинлиги яна бир карра эслатиб ўтилди.

Ўзбекистон автомобиль ва дарё транспорти агентлиги Ахборот хизмати